

HEADLINES (EVENING)

Date – 31/05/2024

Time - 18:30 -18:40Hrs

- Thla thar ni 4 a Lok Sabha inthlanpui vote chhiar tura inbuatsaihna chu peihfel thawkhat a ni.
- Khawvel pum huap Vaihlo Dona Ni World No Tobacco Day, chu vawiin khan Mizoramah hman a ni.
- Manipur tuilian avangin mipuiin harsatna namenlo an tawk mek.
- Naktuka Lok Sabha inthlan thawsarihna leh a tawp tur nei turin inpuahchahna peihfel thawkhat a ni.

<><><>

LS COUNTING

Thla thar NI 4-a Lok Sabha inthlanpui vote chhiar tura inbuatsaihna chu tluang taka kalpui a ni a. Vote chhiarna hmun tura ruahman Counting Hall-te chu Election Commission of India thupek angin vote chhiar hma ni 3 ah buatsaih fel vek tur a nih angina hengte hi District hrang hrangah peihfel vek tawh a ni.

Vote chhiar tura mawhphurhna hrang hrang neite'n training an nei zo fel tawh a. Vote chhiarnaah hian Returning Officer, Assistant Returning Officer, Counting Supervisor, Counting Assistant, Micro-Observers leh hna pawimawh dang hrang hrang thawktu mi 2000 vel an awm dawn a. Security mi leh sa ten Counting Centre tinah thuah thumin venhim hna an thawk dawn a ni.

Chief Electoral Officer Pu Madhup Vyas a chuan, Mizoram pumah vote chhiarna hmun (Counting Centre) 13 awm tura ruahman niin Aizawl District-ah Counting Centre 3 a awm ang a ti a, District dang zawngah Counting Centre 1 theuh a awm ang. Counting Hall 40 a awm dawn a, heng Counting Hall-ah hian Counting Table 379 awmin vote chhiarna dawhkan tinah hian Counting Supervisor pakhat, Counting Assistant pakhat leh Micro-Observers pakhat zel an awm dawn a, vote chhiarna hmun hi ECI ruat Observer ten an vil dawn a tih a sawi a ni.

Counting Table awm zat leh vote chhiar tur Counting Station awm zat hian chhiar hun (round) pawh hi a hril dawn a. Round 5 a chhiar zawh tur Assembly Segment 5 a awm a, Round 4 a chhiar zawh tur awmna Assembly Segment 15 a awm a, Round 3 awmna Assembly Segment 18 awmin Round 2 a chhiar zawh tur Assembly Segment 2 a awm a ni.

Zing dar 8:00 atanga vote chhiar tan tur niin Aizawlah chuan Postal Ballot chhiara bultan a ni dawn a, Postal Ballot chhiar tan a nih atanga minute 30 hnuah EVM

(Control Unit) a vote tlate chhiar zui nghal a ni ang. Vote chhiar lai hi Candidate, Election Agent leh Counting Agent-te'n a hmuna an en thei ang.

<><><>

GOVERNOR

Raj Bhavan Durbar Hall ah vawiin khan Diabetes leh khawsakphung in a ken tel natna chungchang zirhona, Hyderabad Apollo Hospital Senior Phusician Dr. Vasanth Kumar hova neih chu Governor Dr. Hari Babu Kambhampati an a telpui a,

He hunah hian Governor chuan tunlai khawvelah taksa sawizawi tlem luatah natna hrang hrang – zunthlum, BP sang leh a dangte a hluar tak em avangin mahni taksa leh rilru hriselna theuh ngaihpawimawh a tul thu a sawi a. Hriselna chuan nitin hnathawhnaah te leh thutlukna siamna kawngahte pawh nasa taka a nghawng theih avangin mitin chu mahni hriselna ngaihthah lo turin a chah a ni.

Governor chuan Dr. Vasanth Kumar-a presentation leh inkawmhona hman chu hlawkthlak a tih thu sawiin he hun chhimtu zawng zawngte chuan mahni rilru leh taksa hriselna an ngaihpawimawh thar phah ngei a beisei thu a sawi bawk.

He hunah hian tunlai mite nundan thalo avanga natna hrang hrang, a bikin diabetes a thlen dan te bakah nundan leh ei leh in tur ngaihpawimawh a tulna te thlir ho a ni a. Dr. Vasanth Kumar-a chuan hemi chungchanga inzirtirna leh inhrilhriat a pawimawh avangin he hun chhimtu zawng zawngte chu midang hnenah pawh lo hrilh chhawng turin a chah nghal a ni.

<><><>

BODY FOUND

Vawiin chawhma dar 10:30 vel khan Hortoki bul Tlawng kai ah hmeichhe ruang 1 chhar a ni a, tunge anih tih finfiah a la ni lo.

He hmeichhe ruang hi Hortoki a mi tlawmngaiten Tlawng hnar lam atangin a rawn len thla tih thu an dawn bawhzui in an lo hlawm a, hemi hnu hian Kawnpui PHC ah lak anih hnu in mortem examination tih ani a, PHC ah hian Hlimen atangin a ruang finfiah tum an kal a, heng mite hian an khaw mi anih loh thu sawi in, he thu buatsaih lai hian Aibawk khua atangin ruang finfiah tumin khawtlang hruaitu thenkhat chuan Kawnpui PHC hi an pan mek a,

He ruang hi hmeichhe naupang ruang emaw tiin finfiah tur hi an kal a, amaherawhchu post mortem result ah hmeichhe puitling a nih thu finfiah anih tak avang hian tunge a nih zawn that leh a ni.

Hetihlai hian Melthum leh Aibawkah vawiin thleng khan ruang zawn hna thawh a ni a, ruang la hmuh loh zat hi 6 ni a, vawiin lamah ruang hmuh belh a awm lo a ni.

Hriat theih chinah he vanduaina thlenga thi zat hi mi 34 an tling a ni.

<><><>

HLIMEN EVACUATION ORDER

Aizawl District Disaster Management Authority Chairman Aizawl DC Pi Nazuk Kumar-i chuan Hlimen leh a chhehvel leimin hlauhawmnaa cheng zawng zawng te an chenna hmun chhuahtsan hmun him lama insawn turin thupek a chhuaht a,

He thupek hi nimin khan tichhuakin DC chuan Mizoram State Emergency Operation Centre atang leh Directorate of Geology & Mining chuan Hlimen leh a chhehvel leilung hi a nghet lo hle ruahtui tam zawk a tlak chuan chhingatna nasa tak a thleng thei ni a an sawi bawhzuia thupek hi tihchhuaht a ni a ti.

Hlimen khawtlang hruaitute hnen atanga thudawn danin, Hlimen a hmun himlo ni a an ngaih chu Kapdaia Section an ti a, hei hi quarry chim piah lama awm a ni a, helaia cheng te hi chhungkaw 78 vel niin, chhungkaw tam tak chu hmun him lam panin an riakchhuak tawh a, naktukah sorkar hotute nen sawnchhuahtna lai tur te hi an enho leh dawn a ni.

<><><>

WORLD NO TOBACCO DAY

Khawvel pum huap Vaihlo Dona Ni World No Tobacco Day, chu vawiin khan Mizoramah Indian Society on Tobacco & Health, Mizoram leh National Tobacco Control Programme, NHM te tangkawp buatsaihin hman a ni a, Aizawlah chuan Chief Minister Pu Lalduhoma leh Health Minister Pi Lalrinpuiin ten an hmanpui a ni.

Thusawiin Chief Minister chuan, ram hmasawanna leh mipuite hriselna hi thil inzawm tlat a ni a, hmasawanna ruhrel tha tak tak sawrkarin a siam chhan pawh mipuite tan a ni a ti a. Ram mipui nawlpuite hriselna a that tawh loh miau chuan hmasawanna ruhrel nei that ni mahse hmasawanna a khangbai dawn a ni, a ti. Mihring taksa chu zuk leh hmuam mamawh tura siam a ni lova, heng laka fihlim tur hian sum leh pai senso engmah a ngai lova, a thlawna nghei hmak theih thil a ni a, hnam hrisel leh damrei nih tumin insiam that tlan ni se a ti.

Chief Minister hi Indian Society on Tobacco & Health ten Patron Member Certificate an hlan a. He ni puala Essay inziahsiak an buatsaih lawmman a sem nghal a ni.

Health Minister Pi Lalrinpuii pawhin thusawiin, National Tobacco Control Programme hnuiaia sawrkarin hmalakna a neih te leh naupangte hnena zirtirna uar taka kalpui a tulzia a sawi a. Sim duh mahnia sim mai thei lo te chuan district hospital tina Tobacco Cessation Clinic te pan thin turin a chah a ni.

Vawiin vek khan Serchhip District chhunga school hrang hrang ah zuk leh hmuam that lohna in zirtirna hun hman a ni.

World No Tobacco Day puala hun pui ber chu Govt High School, Serchhip ah National Tobacco Control Program (NTCP) leh Women & Child Development Department te tangkawpin an buatsaih a. Vaihhlo laka naupang himna tur thupui hmangin zirhona buatsaih a ni.



ASF

Tun thla chhungin Mizoramah Vawk pul hri (African Swine Fever (ASF) vanga vawk thi zat chu 850 a ni a, vawk suat zat chu 1764 a ni , AH&Vety Dept Deputy Director Dr M. Zohmingthangi chuan a ti.

He thu hi vawiin Akashvani Corr in a kawmnaah sawiin Dr M. Zohmingthangi chuan tun dinhmunah ASF chu Mizoramah a hri len nasat hunlai a nih chhoh mek a ni, a ti a. June leh July thla phei hi chuan tun aia nasa zuala a hri a len nasat a rin thu a sawi a. Tun dinhmunah ASF avanga zangnadawmna dawng turte tan chhawmdawlina pek chhuah a la ni lo a ni a ti bawk.

Vawiin bikah ASF vanga vawk thi zat chu 32 niin vawk suat zat chu 41 a ni a. Kumin January atanga tun thla thleng khan ASF vanga vawk thi zat chu 1186 a ni a, vawk suat tawh zat chu 1876 a ni. Heng vawk thi te hi Tuikual North ah 1 , Muallungthu ah 1 , Thingsul Tlangnuamah 11, Zemabawkah 6, Thingsulthliahah 9, Kolasib Mualvumah 3, Kawnpuihah 2 a ni a.

ASF vanga vawk thi zat kum 2021-22 khan vawk thi zar chu 33417 a ni a, kum 2022-23 khan 12795 niin kum 2023-24 chhungin vawk 1139 niin tihian a vaiin ASF vanga vawk thi zat chu 47351 a ni tawh a. Vawk thu avanga tanpuina dawng chhungkua 2488 an awm tawh . AH& Vert Dept chuan ASF canga vawk chante tanpuina tur cheng nuai 311.66 a dil mek bawk a ni.



MANIPUR FLOOD

Manipur tuilian avangin mipuiin harsatna namenlo an tawk mek. Imphal khawpui chu tuilian tuar nasa an ni a. Tuilian kaihhnawih chhiatna thlengah mi pathum an thi a, midang pakhat chin hriatlohin a bo a. Sipai leh Central force hrang hrang ten chhanchhuah hna an thawk a. Tuilian avanga harsatna tawk chhungkua te chu hmun himah sawnchhuah an ni.

Akashvani Correspondent-in State Water Resources Minister hnen atanga dawn danin tuilian Manipura mipui nuai khat sing 8 leh sang riat chuang harsatna a thlen a ti a. Hmun hniam lai leh Imphal khawpui inkalpawhna laite chu tuin a chim a. Sawrkarin chhawmdawlina camp 56 dinin heng hmunahte hian a theih ang angin in enkawl a ni.

Lui kam tuikhuahna chhia leh tuilianin in leh lo a chim chhiat te siam that hna pawh ngawrh taka kalpui a ni bawh.

Chief Minister N Biren Singha chuan minister leh sawrkar mi pawimawhte nen nizan khan tuilian avanga harsatna thleng mekah hmalak dan tur an rel a. Pi Birena hian Imphal khawpuia chhanchhuah hna thawh dante a endik bawh a ni.

<><><>

LOK SABHA

Naktuka Lok Sabha inthlan thawhsarihna leh a tawp tur nei turin inpuahchahna peihfel thawkhat a ni a. Zing dar 7 atangin vote thlak a ni ang. Inthlan thawhsarihnaah hian Parliament Constituency 57 ah June ni 1 ah vote thlak tur a ni a. State leh Union Territory pasarihah inthlan a ni dawn a, Uttar Pradesh leh Punjab ah seat 13 ve ve, West Bengal ah seat 9, Bihar ah seat 8, Odisha ah seat 6, Himachal Pradesh ah 4, Jharkhand ah 3 leh Chandigarh ah pakhat a ni a. Inthlan thawhsarihnaah hian candidate 904 an awm dawn a ni.

Inthlan thawhsarihna rual hian Odisha-a Assembly bial 42 ah vote thlak a ni bawh ang.

Inthlan thawhsarihnaah hian candidate langsar tak tak an awm a. An zingah hian Prime Minister leh senior BJP leader Narendra Modi, Union Minister leh BJP leader Anurag Thakur bakah Congress leader Vikramaditya Singh leh TMC leader Abhishek Banerjee te an tel a ni.

<><><>